

E ba seo u leng Sona



SABATHA MANTSIBOEA

Bakeng sa Thuto ena bala:

2 Pet. 1:1–15, Ba-Efe. 2:8, Ba-Roma 5:3–5, Ba-Heb. 10:38, Ba-Roma 6:11,1 Ba-Kor. 15:12–57.

Temana ea Khopolo:

“Joale le lōna, le ke le ntšetse hona hoo matla ’ohle a lōna; le eketse tumelo ea lōna ka matla, le matla a eketsoe ka tsebo; le tsebo ka boitšoarō, le boitšoarō ka mamello, le mamello ka borapeli, le borapeli ka lerato la boena, le lerato la boena ka lerato la bohle” (2 Petrose 1:5–7).

E’ngoe ea lintho tse hlollang Testamenteng e Ncha ke hore na ke ’nete e kae e ka kenngoang kelellong ka nako e khutšoanyane. Nka thuto ea beke ena, e karetsang 2 Petrose 1:1–14. Litemaneng tsena tse 14, Petrose o re ruta hore ka ho loka ka tumelo. E be joale o kena hore na matla a Molimo a ka etsetsa ea ba lumetseng ho Jesu eng maphelong a bona. O bua ka ’nete e hlollang ea hore re ka ba le “kabelo ho seo Molimo a leng sona” (2 Pet. 1:4) le hore re ka lokoloha bobolung le takatsong ea lefatše. Ha e le hantle, ha re fumane feela lethathamō la limelo tsa Bokreste, empa Petrose o li beha ka tatellano e itseng. E ’ngoe ka mora e ’ngoe, e ea latela, joalo-joalo ho fihlela sehlohlolo sa e bohlokoa ho tsona tsohle.

Hape o ngola ka bonnete ba se boleloang ke ho ba ho Kreste le ho “hloekisoa” (2 Pet. 1:9) ho tsoa libeng tsa rōna, le ho tlisa khopolo ea tiisetso ea pholoho, tšepiso ea bophelo bo sa feleng “‘musong o sa feleng” (2 Pet. 1:11) oa Morena. Qetellong, re bile re fumana thuto e khutšoane tabeng e matla ea boemo ba bafu. Ke ’nete e kaakang e hlahellang temaneng tse 14 feela!

**Bala thuto ea beke ena ho lokisetsa Sabatha, Motšeanong 27.*

Tumelo ea Bohlokoa

Bala 2 Petrose 1:1–4. Petrose o reng ka seo re se filoeng ho Jesu kreste? Ke hore, ke joang bonnete ba mohau bo bonoang mo?

Petrose o qala lengolo lena ka hore le ngoletsoe bao ba fumaneng “tumelo e tšoanang le ea rōna ka bohlokoa” (2 Pet. 1:1); kapa “tumelo ea bohlokoa joalo ka rona”. Lentsoe le tolokiloeng e le “bohlokoa” le bolela “boleng bo lekanang,” kapa “ho ba menyetleng e lekanang.” O re ba “abetsoe” tumelo ena ea bohlokoa; e seng hore ba e sebelelitse kapa ho ne ho ba tšoanetse, empa hore ba e amohetse, e le mpho ho tsoa ho Molimo. Kapa, joalo ka ha Paulose a ngotse: “Hobane le bolokhile ke mohau, ka tumelo; ha ho tsoe ho lōna, ke mpho ea Molimo” (Ba-Efe. 2:8). E bohlokoa hobane “tumelo ha e le sieo, ha ho ka moo Molimo o ka khahlisoang kateng” (Ba-Heb. 11:6). E bohlokoa hobane ka tumelo ena re tšoara litšepiso tse ngata tse hlollang. Petrose o tiisa hore ka “matla a leholimo” ho Jesu re filoe sohle se amanang le bophelo bona le ho loka (2 Pet. 1:3). Ke ka matla feela a Molimo re bileng re phela, ’me ke ka matla a hae feela re fihlelang khalalelo. ’me matla ana a leholimo re a filoe ka “tsebo ea ea re bitsitseng ka khanya le ka khanya” (2 Pet. 1:3; sheba hape John 17:3).

Re bilelitsoe ho rata Molimo, empa ke joang re ka ratang Molimo oo re sa o tsebeng? Re tseba Molimo ka Jesu, ka lentsoe le ngoliloeng, ka lefatše le hloliloeng, le ka maiphihlelo a ho phela bophelo ba tumelo le kutlo. Re tseba Molimo le bonnete ba Molimo ha re ba le maiphihlelo ba seo a se etsang maphelong a rōna, tsebo e tlang ho re fetola. ’Me re mo tseba ka bonnete ba mohau oo a re fileng oona. Petrose joale o bolela se seng se makatsang: hore hape re filoe “litšepiso tsa bohlokoa le tse kholo,” tse kenyeletsang ho nka karolo ‘semelong sa Molimo” (2 Pet. 1:4). Batho tšimolohong ba ne ba entsoe ka setšoantšo sa Molimo; setšoantšo seo se se sentsoe haholo. Ha re tsoaloa bocha, re ba le bophelo bo bocha ho Jesu, ea sebeletsang ho khutlisetsa setšoantšo sa Molimo ka ho rōna. Empa re lokela ho balehela bobolu ba lefatše le litakatso haeba re batla hore phetoho ena e etsahale.

Bophelo ba hao bone bo tla ba joang haeba o ne o ka hloka tumelo? Karabo ee e thusa joang ho utloisisa hore na hobaneng mpho ea tumelo ruri e leng bohlokoa?

Lerato, sehlooho sa Boleng ba Bokreste

Bala 2 Petrose 1:5–7; Ba-Roma 5:3–5; Jakobo 1:3, 4; le Ba-Galata 5:22, 23. **Ke sehloho sefe se tšoanang se hlahang litemaneng tsee?**

Ho ne ho tloaelehile hara bafilosofara mehleng ea lefatše le khale ho etsa lethathamo la makhabane. Mathathamo a joalo hangata a bitsoa “lenane la Makhabane,” ’me hona le mehlala e ’maloa Testamenteng e Ncha (Ba-Roma 5:3–5; Jakobo 1:3, 4; Ba-Gal. 5:22, 23). Ho lumelaha hore babali ba Petrose ba ne ba tseba mathathamo a joalo, leha hona le phapano e thahasellisang lipakeng tsa seo bafilosofara ba ka se thathamisang le seo Petrose a se thathamisang. Hlokomela hore Petrose o hlophisitse sena ka boomo ka tatellano, ele hore bokhabane ka bong bo hahelle ho makhabane a pele, ho fihlela e finyella leratong e le sehlohlo! Bokhabane ka bong boo Petrose a bo sebelisang bona le moelelo o makatsang: Tumelo: Boemong bona, tumelo ha se letho ha e se tumelo e pholosang ho Jesu (sheba Ba-Gal. 3:11, Ba-Heb. 10:38).

Bokhabane: Bokhabane (Greek *arête*), boleng ba botle bo feng kapa bo feng, bo ne bo rorisoa esita le hara ba-filosofara ba bahedene. Ee, tumelo e bohlokoa, empa e lokela ho isa bophelong bo fetohileng, ka boqhetseke.

Tsebo: Petrose ruri ha a bue ka tsebo e akaretsang, empa e le tsebo e tsoang likamanong tse pholosang le Jesu Kreste.

Boitšoarō: Bakreste ba holileng ba khona ho itšoara litakatsong tse matla, haholo litakatso tse isang boitlopong.

Mamello: Mamello ke tiisetso, haholo moo o tobaneng le liteko le lithloriso.

Borapeli: Fatšeng la bohetene, lentsoe le tolokuoeng mona e le borapeli le bolela boitšoarō bo amanang le tumelo ho Molimo. Ka hara Testamente e Ncha le nka khopolo ea boitšoarō bo tsoaloang ke ho lumela ho Molimo a le mongoa oa ’nete (1 Tim. 2:2).

Lerato la Boena: Bakreste ba joalo ka lelapa, ’me borapeli bo tla isa sechabeng seo batho ba ratanang.

Lerato: Petrose o tlisa lethathamo sehlohlong ka lerato. O bua joalo ka Paulose hape: “Me joale, tse tharo tsena lia sala; tumele le tebello, le lerato; empa e kholo ho tsona ke lerato” (1 Ba-Kor. 13:13).

Pele Petrose a qala lethathamo la makhabane, o re re lokela ho “leka sohle” (2 Pet. 1:5) ho fihlela makhabane. O bolelang ka seo? Ke karolo eo matla a botho a e bapalang takatsong ea rōna ea ho phela ka borapeli, le botšepi?

E ba seo u leng sona

Ka mora ho re fa lethathamo lena la ho re na re lokela ho batla eng re le Bakreste, Petrose joale o phatlalatsa hore litholoana e tla ba life.

Bala 2 Petrose 1:8–11. **Ke khokahano efe lipakeng tsa se seng se entsoe bakeng sa Mokreste le ka moo Mokreste a lokelang ho phela?**

Petrose o khothaletsa babali ba hae ho phela ho latela bonnete bo bocha boo e leng 'nete ho bona ho Jesu. Limelo tsa tumelo, bokhabane, tsebo, boitšoaro, mamello, borapeli, lerato la boena, le lerato ke 'tsa lōna' "me le be le tse na ka bongata" (2 Pet. 1:8). Bothata ke hore ha se Bakreste bohle ba phelang ho latela 'nete ena e ncha. Ba bang ba etse letho kapa ha ba na litholoana tsebong ea Morena Jesu Krete (2 Pet. 1:8). Batho ba joalo ba lebetsa hore ba hloekisitsoe "libeng tsa khale" (2 Pet. 1:9, ho bolela Petrose, Bakreste ba lokela ho phela bonnete bo bocha boo e leng 'nete ho bona ho Jesu. Ho Krete, ba amohetse tšoarello, tshoekiso, le tokelo ea ho nka karolo semelong sa Molimo. Ka hona ba lokela ho "tiisa ho bitsoa le ho khethoa ha lōna" (2 Pet. 1:10). Ha boitatolo ka ho phela joalo ka ha ba phetse pele, ha ho lebaka la ho "nyopa" kapa "ho se behe litholoana" ho Mokreste. "Re utloa haholo ka tumelo, empa re hloka ho utloa hloka ho utloa haholo ka mesebetsi. Ba bangata ba thetsitse meea ea bona ka ho phela bolumeli bo bobebe, ba amohelang, bo se nang sefapano."—Ellen G. White, Faith and Works, p. 50.

Bala ba-Roma 6:11. **Paulose o bolela eng moo se supang seo Petrose a se ngotseng litemaneng tsa kajeno?**

Ka tsela e itseng, bobeli Petrose le Paulose ba re, "E ba seo u leng sona." 'Me re ba bopuo ba bacha ho Krete, re hloekisitsoe sebeng, le ba nka karolo semelong sa Molimo. Ke ka hoo re ka phelang mofuta oa bophelo oo bohle re bilelitsoeng ho bo phela. Re lokela ho ba "joalo ka Krete," e leng seo Bokreste bo se bolelang.

O tšoana le Krete joang? Ke likarolong life tseo u ka etsang batere?

Ho Tsoa Motlotloaneng

“Ke fela ke lekanya hobane, ha ke sa ntse ke le motlotoaneng ona, ke tšoaetse ho le tsoa ka ho le hopotsa, ke tsoe ke tseba hobane nako ea ka ea ho tloha kapele motlotloaneng ona e se e le haufi, joalo ka ha Morena oa rōna Jesu Krete a kile a ntsebisa”(2 Pet. 1:13, 14). Ka 1956, Oscar Cullman o ile a ngola boithuto bo bokhutšoanyane bo bitsoang Ho se shoe ha moea kapa Tsoho ea Bafu: Paki ea Testamente e Ncha. A ritela khang ea hore taba ea tsoho ha e lumellane le ho se shoe ha moea. Hape, o ile a re Testamente e Ncha o lutse hantle lehlakoreng la tsoho ea bafu. “Ha ho sengoloa se seng sa ka,” a ngola ha morao, “se tsositseng thahasello e joalo kapa khalefo e joalo.”

Bala 1 Ba-Korinthe 15:12–57. Paulose o bolela hore ho etsahala’ng lefung?

Boithuto ba hore na Testamente e Ncha e reng ka lefu le tsoho e kholisitse baithuti ba bangata ba Testamente e Ncha hore Cullman o ne a nepile. Testamente e Ncha e nka taba ea tsoho, e seng ea moea o sa shoeng o phonyohang lefu la nama. Ka mohlala, ho 1 Ba-Thessalonika 4:16–18, Paulose o khothaletsa bao ba lahlehetsoeng ba habo bona ka lefu hore ba kothale ka tsebo ea hore ha Jesu a khutla hape, o tla tsoa ba shoeleng. Ho 1 Ba-Korinthe 15:12–57, Paulose o fana ka tlhaloso e eketsehileng ea tsoho. O qala ka ho supa hore tumelo ea Bokreste e itšetlehile tsohong ea Jesu. Haeba Jesu a ne a sa tsoha, eba tumelo efe kapa efe ho eena ke lefeela. Empa, Paulose o re, Krete ruri o tsohile bafung, e le thakangoaha ea ba robetseng. ’Me tsoho ea Krete bafung e tiisa hore bohle ba tla tsoha ka eena bafung.

Paulose o bua ka tsoho ea ’mele ho 1 Ba-Korinthe 15:35–50. O bapisa ’mele e mecha eo re tla e amohela tsohong ea ’mele ea rōna ea joale. Seo re nang le sona joale se tla timela; seo re tla ba sona tsohong se tla ba teng kamehla. Ka kakaretso, ha Testamente e Ncha e bua ka lefu, e etsa joalo mabapi le tsoho, e seng ho se shoe ha moea. Sena se bohlokoa ho tsejoa e le se tlang pele ho ho bala 2 Petrose 1:12–14.

Tumelo le lintšing tsa Lefu

Bala 2 Petrose 1:12–15. Petrose o bolela eng ha a re o se a tla tloha motlotloaneng ona?

2 Petrose 1:12–14 e senola sebopeliso sa lengolo. Petrose o nahana o se a ea shoa, 'me lengolo le fupere molaetsa oa hae oa ho qetela kapa testamente. Hore Petrose o lebeletse ho shoa haufinyane e senola ke pololoana, “ha ke sa ntse ke le motlotloaneng ona. . . ke tsoe ke tseba hobane nako ea ka ea ho tloha motlotloaneng ona e se e le haufi,” e fumanoang ho 2 Petrose 1:13, 14. O lekanya 'mele le motlotloane (tabernakele), eo Petrose a tlang ho e hlobola ha a shoa. Ha e le hantle, e hlakile hoo hore Petrose o bolela 'mele oa hae ha a bua ka ho tloha motlotloaneng hore batoloki ba joale ba toloka polelo ena tjena “ha feela ke ntse ke le 'meleng ona . . . kaha ke tseba hore lefu la ka le haufi” (2 Pet. 1:13. Ha ho letho puong ea Petrose le bolelang hore ha Petrose a “tloha” motlotloaneng kapa 'meleng, moea oa hae o tla phela o ikemetse.

Bala 2 Petrose 1:12–15 hape. Ke joang Petrose a sebetsanang le lefu la hae le haufi, 'me boitšoarano bo bo re bolella'ng ka tumelo?

2 Petrose 1:12–15 e fana ka ho tiea ha mantsoe a Petrose. O ngola sena ka tsebo ea hore bophelo ba hae haufi bo tla fihla qetellong. O tseba sena hobane, joalo ka ha a boletse, “Morena oa rōna Jesu Krete a kile a ntsebisa.” Empa ho bonahala ho se tšabo, ngongoreho, le ha e le tsitsipano. Taba ea hae leha ho le joalo, e ho pheleleng hantle ha bao a ba sieang ka morao. O batla hore ba tiee “nete ea joale,” 'me ha feela a ntse a phela—o tla ba hopotsa ho lula ba tšepahala. Re ka bona mona bonnete le ho teba ha maiphihlelo a Petrose le Morena. E, o se a ea shoa haufi, 'me e ke ke ea ba lefu le monate, le teng (sheba John 21:18; Ellen G. White, *The Acts of the Apostles*, pp. 537, 538), empa khathatseho ea hae e se nang boikhabo ke molemo oa ba bang. Kannete, Petrose e ne e le monna ea neng a phela tumelo eo a e rutang.

Ke joang tumelo ea rōna e re thusang ho lebanya-thebe le bonnete bo tšabehang ba lefu? Ke joang re ka ithutang ho itšoaralla tšepong e bohlokoa eo re nang le eona, le moo re tobaneng le lefu, ka lebaka la seo Jesu a re etselitseng sona?

Ho Ithuta Haholoanyane:

Joalo ka ha re bone, Petrose o ne a tseba hore o se a shoa. 'Me o ne a tseba (ka nako e telele, le teng), hore na o ilo shoa joang. Ke ka hobane Jesu ka sebele o ne a mo boletse. “Ka 'nete-'nete ke re ho uena: Enere ha u sa le mocha, u no u itlama u 'notši, u itsamaela moo u ratang teng; empa e tlare hobane u tsofale, u tla otlolla matsoho a hau, 'me e mong o tla u tlama, a u ise moo u sa rateng teng” (Johanne 21:18). Qetello ea hae e bile efe? “Petrose, e le mojuda le molichaba, o ile a ahloleloa ho hlokoatsoa le ho thakhisoa. Malebana le lefu le mahlonoko lena, moapostola a hopola sebe sa hae se seholo sa ho latola Jesu nakong ea teko ea hae. Ka nako eo o ne a se boemong ba ho amohela sefapano, empa joale lekanya hoba ke thabo ho nehela ka bophelo ba hae bakeng sa evangeli, a utloa feela hore, eena ea latotseng Morena oa hae, ho shoa ka tsela eo Morena oa hae a shoeleng ka eona e ne e le tlotla e fitisang. Petrose o ne a bkile ruri ka seo 'me o ne a tsoaretsoe ke Kreste, joalo ka ho bontšoa ke thomo e kholi eo a e filoeng ea ho fepa linku le likonyana tsa mohlape. Empa o ne a ke ke a itšoarella. Le mohopolo oa mahlomola a pono ea ho qetella a ne a sa fokolise ho baba ha boikoahlae le pako ea hae. E le kopo ea ho qetela a kopa bathakhisi ba hae hore a khokhoteloe sefapanong a shebisitse hloho ea hae fatše. Kopo ea fanoa, 'me ka tsela ena ho ile ha shoa moapostola e moholo Petrose.”—Ellen G. White, *The Acts of the Apostles*, pp. 537, 538. 'Me leha pono ena e le kapele ho eena, khathatseho ea Petrose e ne e le ho phela semoeng ha mohlape.

Lipotso tsa ho Qoqoa:

1. Ka leseli leo Petrose (le bohle lingoli tsa Bibe) a le ngotseng ka tlhokahalo ea Bakreste ea ho phela maphelo a halalelang, hobane boholo ba rōna re hloloa ho ba seo re leng sona ho Jesu?
2. Ka sehlopheng, talimang lethathamo le fanoeng ho 2 Petrose 1:5–7. Buang ka ntlha ka 'ngoe 'me le ipotse: ke joang re bonahatsang ha molemonyana limelo tse ka bo rōna, 'me ke joang re ka thusang ba bang ba batlang ho etsa ho tšoanang?
3. Re shebile seo re se tsebang ka Petrose, joalo ka ha se senotsoe lievangeling, seo a se ngolang ka matla mosebetsi o moholo oo Kreste a o entseng ka ho eena, ho sa natsoe ho hloleha ha hae ha pele. Ke tšepo efe le matšelisao ao re ka inkelang oona mohlaleng oa hae?
4. Ho 2 Petrose 1:12, Petrose o ngotse ka “ 'nete ea joale.” “ 'Nete ea joale” e ne e le eng nakong ea Petrose, 'me “ 'nete ea joale” ke eng nakong ea rōna?
5. “Ke joang bafu ba hlotseng lefu,” e mong o kile a ngola “Lefu ke seo ba phelang ba se nkang.” Ke joang re le Bakreste, re nkang lefu?

